



## "O Usama, zar si ga ubio nakon što je rekao: La ilah illallah- Nema Boga osim Allaha?"

Od Usame b. Zejda, radijallahu anhuma, se prenosi da je rekao: "Poslao nas je Allahov Poslanik, sallallahu alejhi ve sellem, ogranku plemena Džuhejne (koji se zvao) El-Hureka, pa smo ih zatekli ujutro. Jedan Ensarija i ja smo stigli kod jednog od njih, pa kada smo potegli svoje oružje na njega on je rekao: 'La ilah illallah- Nema Boga osim Allaha.' Ensarija ga je ostavio i udaljio se od njega a ja sam ga probio svojim kopljem i ubio ga. Kada smo stigli u Medinu, vijest o tome je stigla do Allahovog poslanika, sallallahu alejhi ve sellem, pa mi je rekao: 'O Usama, zar si ga ubio nakon što je rekao: La ilah illallah?'"

Rekao sam: 'Allahov poslaniče, rekao je to samo da se spasi.' Na to mi je Poslanik, sallallahu alejhi ve sellem, rekao: 'Zar si ga ubio nakon što je rekao: La ilah illallah?'" Ponavljao je to toliko puta, sve dok nisam poželio da sam tek tog dana primio islam." U drugoj verziji hadisa je došlo da je Allahov Poslanik, sallallahu alejhi ve sellem rekao:

"Zar je on rekao: La ilah illallah, a ti si ga ubio?!" Na to je Usama rekao: "Allahov Poslaniče, rekao je to iz straha kad je video oružje." Poslanik, sallallahu alejhi ve sellem, mu reče: "Zar si ti otvorio njegovo srce pa da znaš je li zbog toga rekao ili ne?!" Kaže Usama: "Pa je to ponavljao sve dok nisam poželio da sam tek tog dana primio islam." Od Džunduba b. Abdullaha, radijallahu anhu, se prenosi da je Allahov Poslanik, sallallahu alejhi ve sellem, poslao vojsku idolopokloničkom plemenu, pa su se susrele vojske. Jedan od idolopoklonika bi, kada naumi ubiti jednog muslimana, išao za njim dok ga ne stigne. A kada musliman naumi ubiti idolopoklonika, on bi čekao da ovaj bude neoprezan. Kaže

Džundub: "Govorili smo da je to bio Usama b. Zejd, pa kada je podigao sablju na idolopoklonika ovaj je rekao: "La ilah illallah- Svjedočim da nema Boga osim Allaha", a on ga je nakon toga ubio. Došao je glasnik kod Allahovog Poslanika, sallallahu alejhi ve sellem, te ga je on ispitivao o borbi a glasnik je odgovarao. Tako ga je obavijestio o ovome što je uradio ovaj čovjek (za kojeg su mislili da je Usama b. Zejd), pa ga je Poslanik, sallallahu alejhi ve sellem, pozvao i upitao: "Zašto si ga ubio?" Rekao je: "Allahov Poslaniče, on je ubio dosta muslimana, (pa je spomenuo imena muslimana koje je ubio ovaj idolopoklonik) i ja sam krenuo na njega sabljom da ga ubijem, pa kad je video sablju rekao je: "La ilah illallah - Nema Boga osim Allaha." Allahov Poslanik, sallallahu alejhi ve sellem, je upitao: "Jesi li ga ubio?", odgovorio je: "Jesam". Zatim je Allahov Poslanik, sallallahu alejhi ve sellem, pitao: "Šta ćeš sa (njegovim šehadetom) la ilah illallah na Sudnjem danu?" Kazao je: "Allahov poslaniče, traži za mene oprosta kod Allaha.", a Poslanik, sallallahu alejhi ve sellem, je ponavljao: "Šta ćeš sa la ilah illallah na Sudnjem danu?" i nije na to ništa dodavao.

Allahov Poslanik, sallallahu alejhi ve sellem, je poslao u tajnosti Usamu b. Zejda (sa vojskom) ogranku plemena Džuhejne (koji se zvao) El-Hureka. Nakon što su stigli do njih i opkolili ih, pobjegao je jedan od idolopoklonika, pa su krenuli za njim Usama i jedan ensarija želeći da ga ubiju. Kada su ga stigli on je izgovorio: La ilahe illallah- nema Boga osim Allaha. Ensarija je ustuknuo od njega i ostavio ga nakon što je to izgovorio, a Usama ga je ubio. Nakon što su se vratili u Medinu, vijest o tome je stigla do Allahovog Poslanika, sallallahu alejhi ve sellem, pa je rekao Usami: "Zar si ga ubio nakon što je rekao la ilahe illallah?", odgovorio je: "Jesam Allahov Poslaniče, on je to rekao da bi se spasio smrti." Zatim ga je ponovo upitao: "Zar si ga ubio nakon što je rekao la ilahe illallah?", a on je odgovorio: "Jesam, rekao je to da se spasi smrti, a prije toga je ubio toliko i toliko muslimana." Zatim je Allahov Poslanik, sallallahu alejhi ve sellem, rekao: "Zar si ti otvorio njegovo srce pa se uvjerio u to (da je to rekao da se spasi smrti). Šta ćeš sa njegovim la ilahe illallah kada dođe na Sudnjem danu?" Ko će se zagovarati za tebe i braniti te kada se dođe sa riječima tevhida i budeš upitan: Kako si ubio onoga koje izgovorio riječi tevhida?" Usama, radijallahu anhu, je rekao da je Poslanik sallallahu alejhi ve sellem, toliko ponavljao ove riječi da je Usama poželio da nije primio islam prije tog dana, jer da je bio nevjernik pa tog dana primio islam, bilo bi mu oprošteno ono što je bilo prije toga, a on je učinio ovo djelo kao musliman.

<https://sunnah.global/hadeeth/bs/show/4816>

النّجّاتُ الخيريّة  
ALNAJAT CHARITY

